

四庫全書

史部

欽定四庫全書

史部

北河紀

目錄圖  
卷一至三

詳校官監察御史臣周元良

刑部郎中臣許兆椿覆勘

總校官進士臣朱鈐

校對官待詔臣胡士震

謄錄監生臣吳貽棟

繪圖監生臣趙源崑

欽定四庫全書

史部十一

北河紀

地理類四

河渠之屬

提要

臣等謹案北河紀八卷紀餘四卷明謝肇淛撰肇淛有史觴已著錄此書乃其以工部郎中視河張秋時作明史藝文志著錄卷數與此本同前列河道諸圖次分河程河源河工河防河臣河政河議河靈八紀詳疏北河源

委及歷代治河利病搜採頗備條畫亦頗詳  
明至山川古蹟及古今題咏之屬則別為四  
卷附後名曰紀餘蓋河道之書以河為主與  
州郡輿圖體例各不侔也

國朝順治中管河主事閻廷謨益以新制作北  
河續紀四卷雖形勢變遷小有同異要其大  
致仍皆以是書為藍本蓋其發凡起例具有  
條理故續修者莫能易焉肇淞著作甚夥而



明史於文苑傳中獨載此書稱其具載河流  
原委及歷代治河利病其必有以取之矣乾  
隆四十六年十二月恭校上

總纂官臣紀昀臣陸錫熊臣孫士毅

總校官臣陸費墀



# 北河紀序

國家漕東南以輸天府浮會通河畫地而分三都水郎以時飭其隄防近稍增置厥員乃其遡魚臺而亘天津旁淪乎汶泗洸沂濟漯淇衛漳洺潞沱諸水而悉節制之以為吾用則北河之履延袤特遠奉璽書以提衡諸路蓋其任若斯之重也賴天子神聖河伯効靈使者按故牘以時疏壅塞決而無復事矣去黃稍遠不藉其利亦不食其害乃盱衡而尋故轍則亦有奪張秋蝕穀亭

漣南陽負薪沈璧之不暇者歲時小梗偕箸尤厘藉非  
涉歷深攷究覈胸中具有全河庸詎捐金錢而役徒隸  
漫以填陽瘠之壑為吾譬之人身凡河渠之支諸經絡  
也河使引鍼石導治者也已事其醫案也二百年來病  
不一症治不一方案脉理而檢禁方而湯液灼熨之用  
吾可以無它求矣賊河之南北醜也豈其明德必禹之  
功戊己築而張秋奠夏村濬而新河通蠱而後有事焉  
行乎其不得不行猶之乎行所無事也蛇已成贅足焉

新不從爛額焉不事事與太多事兩者皆譏已執其咎而復貽難於後之人是經絡方術之未諳而徒以人費者也謝君在杭夙負通才華實兼茂閱歷既深成績可紀分曹北河幸平成之多暇訪古河渠溝洫之志而更充拓之彊為八紀信而可徵詳而有體繩繩乎有用之文也嗣斯職者展卷而周防蓄洩之術禁圉調集之規方程稍食之覈局以內思過半哉神而明之即漕河全局猶是矣或曰古今無同局奈何曰治水猶治厯也天

官者流雖有定度必時而測之禹躬胼胝豈無父書程  
於舊章而周爰荒度以勤于其官又余所佇望時賢而  
共期玄圭之錫者

北河紀序

北河紀者謝大夫在杭治北河之所著也其稱北河者  
國家轉漕之路自維揚至天津畫而為三而此直其北  
也三河皆治以部使者而北河所轄千餘里於賜履最  
廣其治所在張秋即宋景德鎮明興河屢決其地徐武  
功劉忠宣先後奉命築塞費金錢無算易鎮名安平蓋  
其重也自忠宣而後稍有寧宇然而汶濟之間南北建  
瓴漕艘往來倚諸泉為命涓滴供之尾閭洩之土脉一

枯泉源立涸故河之患患在水少清源以北漳衛合流  
注以潯沱灌以瀛海泐然巨浸淫雨一零千丈立潰故  
河之患患在水多以歲之而列之曰河程河源河工河  
防河臣河政河議河靈事詳而不枝記繁而不濫曰吾  
在河言河耳河之外非吾職也在昔為河書者始于禹  
貢禹貢所敘次首九河次濟漯孟氏謂䟽之淪之以為  
禹功者大較皆大夫部內九河故道雖久已湮沒而總  
之併入于衛河今不用䟽而用隄濟水自任城漯水自



東郡皆達河入海今皆逆而為漕用泗上諸泉不見于禹貢亦濟漯之支也今雖用淪而兼用積其治法與禹不盡同孟氏稱禹行所無事無事云者順水之性為之先驅以聽其所往耳非能有損益于水也今水少者欲使多水多者欲使少禹以人為水用今以水為人用微但人苦即水亦甚苦之由茲以談有事耶無事耶使禹生于今日將安施耶禹之史臣而紀今日之河事其能無意于茲編耶要于率用舊章因勢順流毋墮已成之

績母微難冀之功無事有事無事使河與人兩相  
習而不相害則大夫之志也大夫自為諸生即工古文  
辭所為聲詩靚深婉麗近世罕見其倫居官所至惟好  
讀書頃在都門日從余借秘閣書本抄錄讐校窮日夜  
不休此其人宜置石渠天祿間乃通籍二十餘年更兩  
郡厯兩都皆舉其職而尚淹郎曹杜陵以工部稱何遜  
以水部著造物者殆以此官重大夫著述甚多皆必傳  
于世在河言河亦掌故家所不能廢者屬余謝事道安

平大夫出以相示使效一言余不習河事何以復大夫然嘗往來河上有槩于衷故臆而論之如此亦談河渠者之一快也



北河紀目錄

卷首

北河全圖

安平鎮圖

卷一

河程紀

卷二

河源紀

卷三

河工紀

卷四

河防紀

卷五

河臣紀

卷六

河政紀

卷七

河議紀

卷八

河靈紀


是紀也無所取裁大率以河事為主而文附焉其它  
山川往蹟以及古今志咏別為四卷命曰紀餘附於  
其後蓋欲徵文以取信或未免掛一而漏萬也潤色  
損益以俟後之君子晉安謝肇淛識


欽定四庫全書


目錄





北河全圖











聊城縣南界

周家店閘

李海務閘

減水閘

減水閘

減水閘

減水閘

通海橋閘

永通閘

聊城縣北界  
博平縣南界

坡水入運

聊城縣北界  
平山衛南界

東昌府

崇武驛


平山衛北界

聊城縣南界

進水閘

聊城縣北界  
堂邑縣南界

圖六



梁家鄉開

減水閘

減水閘

誠水閣

進水閘

土橋南

近水園

減水閘

進水閘

博平縣北界

清平縣南界

堂邑縣北界  
清平縣南界


清平縣北界  
博平縣南界

博平縣南界

博平縣北界  
濟平縣南界

清平縣南界

清陽驛



堂邑縣印

戴家灣


河衛

圖七





夏津縣北界  
武城縣南界



田馬營驛

武城縣北界  
恩縣南界


清河縣北界  
夏津縣南界

夏津縣北界  
武城縣南界

武城縣北界  
故城縣南界


故城縣北界  
德州街南界

德州衛北界  
故城縣南界





新橋驛




南皮縣北界  
天津右衛南界  
磚河驛


交河縣北界  
河澗衛南界  
河澗衛北界  
交河縣南界  
青縣南界  
青縣北界  
天津左衛南界

圖十一

漢河




滄州北界  
天津右衛南界  
天津左衛北界  
興濟縣南界





漢河

天津左衛北界  
青縣南界

金龍口




泉源圖




# 安平鎮圖

里十六縣阿東至東 里十七州平

東至南東



東至北



里百二


昌府十九里

西至陽穀縣四里

西至南壽張

縣城

里十三





欽定四庫全書

北河紀卷一

總叙

明 謝肇淛 撰

國家定鼎燕山一切軍國之儲取諸七大藩舳艫銜尾而入五千里不絕而江南十七焉江南之漕廣陵當其咽喉上江來者至自儀真下江來者至自瓜洲鎮由廣陵而達淮安為南河由黃河而達豐沛為中河由山東

而達天津爲北河由天津而達張家灣爲通惠河之四  
河者天子使部院大臣總其政而分部以四尚書郎賜  
之璽書令得便宜行事惟是不腴之治南至魚臺北至  
天津統轄千有餘里任綦重治綦難治而不知其政當  
尸官知其非所治者當侵官作北河紀禹畫既界都邑  
錯壤衣帶盈盈蜿蜒朝宗各有賜履無相軼也紀河程  
第一崑崙建瓴四瀆底定汶泗如綫旁及蹄涔聚毛爲  
裘斲於濟耳紀河源第二陽侯旱魃相遞爲灾畚鍤歲

興民不堪命非常之原衆所懼焉紀河工第三乘天之  
符相地之行無實實無虛虛因而操之乃聽節制紀河  
防第四命吏棋置臂指相帥省試之以時黜陟之以歲  
歲事不脩繇官邪也紀河臣第五官常既臚庶績乃熙  
上行令下行意期無反汗而後即安紀河政第六跣者  
鹿而舄者肉聚訟焚如古人所歎擇其可見諸行者紀  
河議第七百神受職允猶翕河邊豆之事有司存矣故  
紀河靈第八終焉謝肇淛曰吾今而後知河之難也善

人謀者未必具地利有地利矣未必得天時三者既備有其舉之而物力絀焉任使之弗臧無論吏操三尺以從即旋舉旋躡空糜金錢國家亦何利賴之有鯀以圯族殛而禹以行無事成知鯀禹成敗之故者知河事矣

河程紀

元世祖既定江南漕轉之路自浙西入江淮由黃河逆流至於中灤登陸以至淇門復由御河登舟以達燕京至元二十年以江淮水運不通乃命兵部尚書李奧魯

赤等自今濟寧州開河達於今東平州之安民山凡百五十里北自奉符為一牒以導汶水入洸東北自兗州為一牒以過泗沂二水亦會於洸以出濟寧之會源牒分流南北其西北流者至安民山以入清濟故瀆經東阿縣至利津河入於海其後海口沙壅又從東阿陸轉二百里抵臨清州以下御河二十六年以壽張縣尹韓仲暉言復自安民山之西南開河由壽張西北至臨清徑達於御漳凡二百五十里是名會通河會源以南為

逆以北為順南接豐沛北迄天津凡一千五百餘里而推輓之勞不事焉今列其程於左

沛縣泗亭驛北九十里至魚臺縣之河橋驛

原有沙河魯橋二驛

後併為一

九十里至濟寧州之南城驛

在城南

一百里至汶上縣之開河驛

在縣西南三十里

七十里至東平州之安山驛

在州西南十五里

七十里至陽穀縣之荆門驛

在縣東四十里安平鎮之西岸

九十里至東昌府聊城縣之崇武驛

在城東

七十里至清平縣之清陽驛

在縣西南三十里

六十里至臨清州之清源驛

在新城內西北隅

七十里至臨清州之渡口驛

七十里至武城縣之甲馬營驛

在縣北三十里

一百一十五里至德州之梁家庄驛

在州南七十里

七十里至德州之安德驛

在城西北

七十里至德州之良店驛

七十里至吳橋縣之連窩驛

在縣東五十里

七十里至交河縣之新橋驛

在縣東五十里俗名泊頭驛

七十里至滄州之磚河驛

在城南

七十里至興濟縣之乾寧驛

在城西

七十里至清縣之流河驛

在縣北四十里

七十里至靜海縣之奉新驛

在城西

一百里至武清縣之楊青驛是為天津入於海自此而

北復為逆河矣





北河紀卷一

欽定四庫全書

北河紀卷二

明 謝肇淛 撰

河源紀

元初漕路自中灤登陸其後自任城開渠以通漕任城者今之濟寧州也則濟寧之南即中灤矣按元史灤河源出金蓮川由松亭北經遷安東平州蓋自徐沛而北河流漸微故灤河雖通東平州而力不任漕及開會通

河以至臨清則自臨清而北衛水之流盛而漕復可以  
飛杭而濟矣此會通河者衛水不南河水不北獨賴汶  
泗沂沭諸泉以濟其流者也

汶水之源有三一發泰山仙臺嶺一發萊蕪原山之陽  
一發萊蕪寨子村會泰山諸泉至靜封鎮合而為一謂  
之大汶口轉西南與小汶河合小汶河之源出新泰宮  
山之下西流至徂徠山陽入於大汶合流至寧陽西北  
分而為二其一為元人所改由埭城南流別為沭水其

一由堽城西流至東平州東五十里會坎河諸泉至四汶口而分其西流者入大清河由東阿而北至利津入海此故道也永樂中開會通河乃於寧陽之北築堽城壩以遏其入洸之流於坎河之西築戴村壩以遏其入海之路使其全流盡出汶上城北二十五里受灤當諸泉謂之魯溝又西南流至城北二里受蒲灣泊水謂之草橋河又西南流十里謂之白馬河又西南流二十里謂之鵝河鵝河者故宋之運道也洄而為渠汶水由之

又西南十五里謂之黑馬溝又西南至南旺入於漕六  
分北流四分南流入汶之泉百四十有四在新泰者二  
十有五曰太公曰北陳曰南陳曰北鮑曰路踏曰南師  
曰魏家曰名公曰張家溝曰柳溝曰西都曰孫村曰西  
周曰西周新曰公家莊曰劉都曰北流曰古河曰萬歲  
曰劉杜曰周家曰崖頭曰和莊曰名灣曰靈查在萊蕪  
者二十有四曰海眼曰坡里曰湖眼曰朱家灣曰張家  
灣曰蓮華曰鵬山曰趙家曰坡草灣曰郭孃曰韓家溝

曰牛王曰王家溝曰半壁店曰小龍灣曰烏江岸曰鎮里  
曰薛家莊曰水河曰魚池曰新興曰賀家灣曰淶馬曰  
青陽港在泰安者四十有七曰張家曰木頭溝曰龍灣  
曰梁子溝曰謝過曰馬兒溝曰風雨曰周家灣曰鐵佛  
寺曰清曰鳳凰曰阜泥溝曰雲潭曰鯉魚溝曰范家灣  
曰板橋灣曰北滾曰順河曰井曰滄浪溝曰吳山溝曰  
梁家莊曰顏謝曰濁河曰斜溝曰羊舍曰力溝曰龍堂  
曰東西二柳曰小柳曰黑虎曰海旺曰新莊石縫曰水

卷二  
波曰韓家莊曰上曰臭曰馬蹄曰朔港溝曰水磨曰狗  
跑曰報恩曰陷灣曰胡家港曰馬黃溝曰龍王曰坤溫  
在肥城者九曰黃家曰吳家曰臧家曰董家曰鹽河曰  
開河曰拖車曰馬房曰清在平陰者二曰新柳溝曰泊  
頭在寧陽者四曰龍港溝曰龍魚曰魯姑曰灤瀆山在  
東平者二十有五曰獨山曰洄曰芭頭曰源曰郝家曰  
淨曰新曰大黃曰二黃曰鐵鈎嘴曰半畝曰饒饒曰安  
宅曰淨汶曰大成曰張胡郎曰主老溝曰蓆橋曰吳家



曰安園曰高家莊曰坎河曰灰曰蘆曰徐家莊在汶上  
者六曰龍岡曰薛家溝曰趙家橋曰雞爪曰灤淄曰馬  
莊在蒙陰者二曰官橋曰卞家莊

按齊魯之間水由地  
中行處處皆泉也故

舊泉十七新泉十三與府  
志所載詳略不同下倣此

泗水之大源出於陪尾山之下四泉同發故曰泗水亦  
因以名其縣四泉合而成流西南行經於卞城其西有  
泉數十自縣之南境北流入之又有泉數十自縣之北  
境南流入之自此西過其縣北又西過曲阜城北五里

分為二流北曰洙瀆流繞聖墓之前而泗水繞其後皆過孔林西復合為一西至兗州府城東五里金口閘東沂水雩水入之沂水大源出尼山之麓過曲阜南而至雩水出曲阜南馬跑泉過鄒縣境而至總謂之泗水入兗州府城而西至於西門之外納闕黨蔣詡七泉合而成流謂之濟河至城西過上樓閣杏林閘凡六十里至濟寧城東屈從南門合於洸入於漕泗水諸源之泉在本縣者五十有九曰珍珠曰趵突曰黑虎曰淘米曰雪

花曰繁星曰蓮花曰白石曰濤靡曰雙睛曰甘露曰甘露新曰卞莊曰奎聚曰新開曰新開二曰響水曰紅石曰涓涓曰湧珠曰三台曰天井曰琵琶曰驪珠曰石壑曰石竇曰石液曰雙石縫曰石露曰杜家曰石井曰里澇溝曰蔣家曰曹家曰趙家曰合德曰東巖石縫曰龜陰曰龜眼曰龜尾曰鮑村曰珍珠曰醴曰醴前曰七里曰大玉溝曰小玉溝曰蘆城曰西巖石縫曰三角灣曰吳家曰黃溝曰嶽陵曰石河曰壁溝曰馬莊曰馬跑曰魏莊在

曲阜者五曰橫溝曰埠下曰新安曰城北新開曰蜈蚣  
沂水諸源之泉在曲阜者十有九曰珠河曰詠歸曰雙泉  
曰遷泉曰輞泉曰柳青曰茶泉曰城北新泉曰城南新泉  
曰新泉曰連珠曰溫泉曰濯纓曰巧泉曰曲溝曰青泥曰  
青泥曰新安曰埠下曰近溫泉兗州府城之西而會於  
泗者為滋陽之泉曰西北新泉曰東北新泉曰關黨泉  
曰古溝曰負瑕曰上蔣詡曰下蔣詡曰驛後曰紙房新  
泉而其自入於漕者則濟寧浣筆泉

永樂中既築堽城壩以遏汶水入洸之流而洸河幾絕然堽城之南官莊河之入於洸者如故但其源微而流不長成化十一年主事張盛復為堽城石閘稍分汶之支以益之遂西南流至濟寧南門會沂泗二水入于漕官莊河之源出於寧陽之九泉曰柳曰金馬莊曰古泉曰古城曰蛇眼曰井泉曰三里溝曰張家曰李家滕縣之境東為三河口合流入漕三河者沙河薛河南石橋河也

沙河有二北沙河之源出嶧山南流繞龍山之左至滕縣北受七里泉又南分為二流其一出休城南至於馬家口其一出休城北受大吳泉又西受北石橋泉又西受白水白水即界河也其源出於龍山西麓總而曰北沙河南沙河即漵水源出述山之麓西流會以黃約山諸泉又過鳳凰山東納龜步泉又南過華蓋山納石溝泉過滄浪淵納明河水西而入於漵水會南梁水總而曰南沙河北兩河者故由三河口趨湖隆慶元年築黃

甫等壩開辛章支河十二里過之使北以滙於湖由南陽入漕而滕縣之泉入沙河以達於漕者曰北石橋曰三里橋曰七里曰大烏曰交溝曰趙溝曰荆溝曰劉家溝曰趵突曰三界曰龍灣凡十一泉

薛河之源出寶峰山東諸泉謂之西江西流而納永豐鳳凰二泉至於薛山故曰薛河南流而納東江之水又西而納玉花三山二泉南入南明河故由三河口趨湖隆慶元年築東邵等壩開王家口支河九十六里使之

南由微山入湖從地埤溝入漕而滕縣之泉入薛河以達於漕者曰魏家莊曰黃溝曰白山曰溫水曰黃家泉并玉花三山凡七泉至三河口而會者曰石橋泉至呂孟湖而會者嶧縣之泉曰龍王曰搬井曰許池曰許由曰溫水南石橋河即俗稱牛溝水南流與沙薛為三河及沙過而北薛過而南惟此河改從佃戶屯入漕而滕縣黃溝泉亦匯焉南自沛縣之珠梅閘北至魚臺之南陽閘長八十里皆新河也而魚臺之泉曰東龍泉曰西



龍泉曰平山曰古泉曰庶家曰聖母曰黃良曰中溢曰  
高家西曰高家東曰河頭曰聖水曰廟前曰何家曰陳  
家此十五泉者合流而至硯瓦溝由南陽入於漕

自濟寧州之魯橋閘北至師莊閘二閘之間為五空橋  
泗水南流與白馬河之水入之白馬河之源出於九龍  
山西過鄒縣受蓼河之水西北折而南流受鄒縣之泉  
曰鱖眼曰孟母曰東家溝曰白馬曰岡山曰白莊曰三  
角曰柳青曰淵源曰黃溝港曰程家莊皆會流而入魯

橋又有托基泉入於棗林間蘆溝泉入于南陽間

御河之源出河南衛輝府輝縣蘇門山百門泉東引滏  
洹淇三水流千里為館陶會漳水又北九十里為臨清  
與會通河合是河也漢名屯氏隋名永濟渠又名御河  
以其源出衛州又名衛河

漳河之源出山西之長子曰濁漳樂平曰清漳俱東經  
河南之臨漳分流至館陶西南五十里與衛河合入於  
漕至萬厯初漳河北徙由魏縣入曲周釜陽河而館陶

之流絕

衛河北流至于青縣之南滹沱河之水入之滹沱河  
之源出於大鐵山自代郡鹵城東流經獻縣城南十  
一里單家橋至青縣南岔河口入運河合流而北至  
於天津入於海

黃良泉記畧

元頓舉

皇慶元年壬子東平景德鎮行司監丞奉議大夫劉  
公蒞官之始克勤乃事凡所轄去處躬親閱視隄岸

之卑下者增築之水脈之淺澁者疏通之沂流尋源自北而南過古之任國歷今之魯橋涉泗汶合流之次里幾一舍而抵黃山之麓覺其土脈膏潤復進而前得泉沮洳而出可以濫觴者數穴泓澄於沉沙之間俯而探之溫如湯掬而飲之甘如醴以杖引之遂勢而行又如蛇之赴壑就命役夫鑿為溝港注之於河其流甚順溶溶洩洩不舍晝夜即召彼故老詢所稱呼莫有知者因以是泉出乎黃山其性

甚良宜目之曰黃良泉遂勒諸石以告來者遣以禮  
命文於予予特佳公之任職也效其能以成其事泉  
之遇公也出乎隱以彰乎名一舉而二美并故樂道  
之

疏鑿泉林寺泉源記

明湯節

廬江人  
參將

距泗水邑東五十里許陪尾山之陽有廟曰仁濟廟之  
西有寺曰泉林其殿宇巋然林木蒼鬱鳥聲樵唱雅焉  
於中傍有泉曰玆珠曰趵突曰掬米曰洗鉢曰響水曰

紅石曰清泉曰湧珠其源皆出於山澄如湛如其流環繞映帶寺之左右而西南經卞橋橋之西復有泉數十曰大玉溝小玉溝渚波黃陰趙家庄石泉珍珠東巖石縫西巖石縫三角灣等泉合流于泗會于曲阜之沂河轉于天津閘會通河沿淮達海永樂己亥漕運前總兵平江伯陳公瑄言于朝爰命工部主事顧大奇等徧歷山川疏濬泉源以通水利以濟漕運後右通政王孜郎中史鑑主事侯暉等繼之不減顧公之能正統己未朝

廷簡事之宜所司請罷是舉其上下泉源因以淤塞余  
時董督糧儲心計指畫以泉源利濟所資不可無官以  
典其事乃請上可其奏於是主事熊鍊傳弼等官銜命  
來茲仍疏導之其利澤及於人多矣邇來亢旱不雨河  
道將涸余親詣泰安州等處疏通大小泉源踰泗水見  
乎泉林之泉利人者廣繇是逆流不便者改之亂石者  
去之不通者濬之又博訪故跡得聆耆耆者言是泉皆  
從石竇中出清澈無比汪洋不窮余聞而益喜泉之舊

有名者勒珉以紀之無名者立石以表之用為名山勝  
槩之助尚慮未既復同泗水縣官訪于邑之少長所得  
石河等泉一十三道泉無巨細皆為之開鑿以濟不通  
事既集遂書以識之使後來者有所知焉時正統九年  
八月也

蛇眼泉記略

吳

寬

長洲人吏部尚書

國家遷都于燕其食貨之人悉資舟楫由京師而南舳  
舳凡數千里不絕孰非河渠之所浮乎地勢隆汙望若



階級置埽蓄水洩復盈焉又孰非泉源之所濟乎泉多  
見于齊魯之地其發甚微其流甚迂微則易湮迂則易  
竭夫使滔滔汨汨出而無窮者又孰非人力濬導之乎工  
部所掌水利其一特設主事分治之成化十六年予同  
年洛陽喬公廷儀奉命以往當歲之春泉脉初動廷儀  
輒率官吏召卒徒出而從事畚鍤濬導如法勤敏之稱  
徹于中朝顧所至露處無以為風日之庇乃築亭泉上  
名曰觀泉求予文以記其成惟古人之樂多托于山水

若柳之愚歐陽之釀可以槩見獨惜其人皆放斥于外而不盡其用于時徒啜其清漱其甘以自娛而已若廷儀則以泉為職者也方其從事于斯厯曠野入重山可謂天下之至勞及功之將畢視其溢然沛然濟河渠載食貨以給國用亦可謂天下之至樂故泉一也停蓄而無為觀之者樂其適已發洩而有用觀之者樂其濟世初廷儀受代為吾友徐君仲山嘗著泉志凡泉之形狀流行具載于編計百二十餘其用心可謂密矣今廷儀

且滿任而閩黃君世用將往代之世用練達詳慎特推  
舉其職殆無難者夫亭不足書而泉則重事也以三君  
相繼敢叙其功而望其成焉

龍關泉記略

陳

侃

閩懷安人  
東平學正

冬官尚書郎喬君廷儀奉命督濬東泉委出濟漕舍樁  
躡屐窮幽陟險抵於汶上之東北越四十里許登樂瀆  
山乃見怪石特出堅壤蹲起有泉一泓涓涓南瀉度其  
勢必有殊勝因建小亭以時舍止又西迤三里至龍關

泉泉脉鼎沸若兩虬相擊其左右則皆翠羽之木龍鱗  
之石下則一派南流皎拖晶練奔放縱激寒冽清漾於  
是順勢於自然命官集衆操鋪備畚濬源汴流決排壅  
塞使由魯溝入會通河因構亭一楹翼然泉上每視泉  
時憩息而聽政名曰觀泉繚以周垣樹以杞柳扇啓以  
時以屏囂雜工成乃遣汶上丞徵記於余余讀衛武公  
之詩曰用戒戎作用遏蠻方又曰夙興夜寐洒掃庭內  
夫武公衛之元老既有蠻方之寄猶然不廢於洒掃之末

乃知蓋臣慮周天下事無巨細罔不殫乃厥心耳且漕  
河非泉不流而石傍山雷往往發源於層巖沓嶂之間  
治水使者憚於露宿以濬其源以故壅於泥沙分於田  
圃而不能自達漕河者衆矣喬君之治水也凡得數百  
泉而其遠於郡邑者皆令剡亭駐節以布水政雖若細  
故無裨於民而使後之人不憚露宿以濬泉源其所裨  
於漕運以裕夫國計者實大蓋又非洒掃庭內之比者  
也君名縉家於洛陽漢儒喬仁之裔仁傳大戴禮世相

沿襲君雖以詩魁鄉薦尋以禮登壬辰進士今來職水  
凡所効於水者靡所不究而君之才固不止是吾之所  
望於君者亦不止是顧嘗一嚮而知一鼎之味矣

柳泉記略

王大化

儀真人工  
部員外郎

柳泉出寧陽城西舊入于洸以達于泗末派浸淫淪于  
沙者幾七十年非其性也嘉靖丙戌默泉吳子來董泉  
事補偏刮垢式克有緒越明年丁亥周爰詢咨迺召屬  
吏語之曰胡村之南可棄也其壤惡洸河之東可渠也

其勢下道且古河之西可引也夷而徑也僉曰唯唯因請于少司空蘭谿章公公曰盍亟圖之于是卜日料工指洸之兩涯曰牐此則為牐者二蓄洩時矣指邑之南曰橋此則為橋者一涉無病矣指民田麗于西河之西者曰易此則因用厲矣蓋心計而身親之不憚瘁焉導若泉東至于洸又東至埭河折而南又東入于蛇眼金馬諸泉既與濯合于泗而其利猶夫舊也經始于丁亥秋九月之朔迄戊子春二月告成渠之長以步計二千

一百七十有六廣七步有奇石以尺計一千九十有五  
孰以塊計如其數以斤計者灰一萬六千八百四十礬  
二百三鐵一百六十椿木以根計五百四十稍柴以箇  
計八百三十力役于泉夫以名計五百二十財取于曠  
役以斤計者三洗河灘地償之民者以畝計一十有八  
夫以數十年湮廢復之一旦無違時無徂常無問有司  
默泉者可謂無負其職也遂為之記俾來者觀焉

新泉序

張克文

新淦人  
工部主事



國家輓東南數百萬粟漕流達于京都南旺其襟喉而  
泉源其血脉也舊泉凡二百二十有六分濟南北前人  
之計周矣文奉命兼理之明年壬申遍歷諸泉其曲徑  
危梁不能輿者躡履從之務窮其源凡舊泉所出悉按  
圖治之矣顧圖所不載者厯州縣有之召父老問故曰  
泉豈有窮夫則有限如開一泉必增數夫故使者不及睹  
有司不以告余因進諸長吏以矢之必不以泉益夫以  
水困民也惟取盈于舊額蠲其遠役而調停焉如是而

民心悅遂報新泉三十六處併而入河計所助之利視  
昔亦加多或曰新泉中有甚微細者顧亦取而濬之而  
記之何抑不見閘乎水涸舟膠既障之板又從而固之  
加蓆草焉懼其涓滴不為用也夫已涓滴而塞其流不  
涓滴而導其源可乎矧今不紀後將何稽故序其說如  
此

論疏龍闢泉略

張

純

漳浦人  
工部主事

斯泉之始出也會樂當諸泉以出魯溝河水勢盛大即

陪尾之趵突徂之濁河不多讓也迂回四十餘里而  
至蒲灣泊則地漸平矣由泊而至金龍口又若少昂然  
者是以諸泉水阻不得下稍有漲漫則盡由蒲灣泊以  
出栢浪橋民田往往渰沒而金龍口亦隨以淤是于民  
則害而于運則失其利也歲丁卯五月分水幾告竭矣  
試調衆一疏濬之旬日間閘河水若增四五寸然則疏  
濬之功可待時乎隄蒲灣以防其漫濬金龍口以順其  
派此其喫緊也

廢泉論

泉之資于漕大矣而亦有不必要者如蒙沂之泉所以  
濟邳河然自塞孫家口黃河悉由徐呂至邳則邳無資  
于泉也是以弘治中巡撫徐公源議棄此泉且并夫省  
之蒙沂之民至今利焉滕嶧魚之泉所以出沙河而并  
及二洪然自鑿新河諸泉雖由呂孟等湖入運而湖波  
浩蕩自有餘濟則滕嶧魚之泉有可也傳夫以寬民非  
與然河之遷徙靡常姑自我朝論之嘉靖十三年水

行趙皮寨穀亭流斷二洪告涸向非天助其順自衝夏  
邑以出小浮橋則人力如之何哉十九年決雞鳴岡由  
渦經亳以入淮二洪又涸向非王公以旗力開李景高  
口則二洪幾不濟矣然猶幸其可以智力成則人亦天  
也今所恃者天耳萬有不測甚而人力無所施則二洪  
涸安得不賴滕嶧魚之泉乎邳河溢又安得不賴蒙沂  
之泉乎是不可不預待也

北河紀卷二

欽定四庫全書

北河紀卷三

明 謝肇淛 撰

河工紀

漢文帝十二年冬十一月河決酸棗東潰金隄興卒塞

之

金堤今在濮州南  
迤東北抵安平鎮

武帝建元三年河水溢於平原

今德州

元帝永光五年冬十二月河決初武帝旣塞宣房後河

復北決於館陶分為屯氏河

即今衛河

東北入海廣深與大

河等故因其自然不隄塞也是歲河決清河靈鳴犢口

而屯氏河絕

成帝建始四年河決潰金隄凡灌四郡杜欽薦王延世

為河隄使者延世以竹落長四丈大九圍盛以小石兩

船夾載而下之三十六日隄成改元河平

隄在今安平鎮之南延亘

渡鄭

鴻嘉三年楊焉言從河上下患底柱隘可鑄廣之上從



其言使焉鑄之裁沒水中不能去而令水益怒是歲渤海清河河水溢灌縣邑三十一敗官亭民舍四萬餘所使者賑之

從許商等議故不塞詳見河議

新莽三年河決魏郡泛清河以東數郡先是莽恐河決為元城塚墓憂及決東去元城無水故遂不塞

隋煬帝四年發河北諸郡男女百餘萬開永濟渠引沁水南達於河北通涿郡名曰御河

周世宗顯德初河決東平楊劉口遣宰相李穀監治堤

自陽穀抵張秋以遏之然河決不復故道分爲赤河

宋真宗咸平三年五月始赤河決擁濟泗鄆州城中常

苦水遣工部郎中陳若拙經度徙城於東南十五里

神宗熙寧元年河溢恩冀等州都水監丞宋昌言屯田

都監內侍程昉獻議開二股河以導東流司馬光是其

策請於二股之西置上約澣水令東東流漸深即塞北

流放出御河以紓恩冀之困從之既塞北流而河自其

南四十里許家澣東決泛濫恩德諸境時方濬御河乃

罷其役專治東流

四年十二月令河北轉運司開脩二股河上流并塞第五埽決口

五年二月甲寅興役四月河成深十一尺廣四百尺水入于河決口亦塞

八年發卒萬人自王供埽開濬引大河水注之御河以通江淮漕運仍置斗門以時啓閉

徽宗崇寧元年冬詔開臨清縣壩子口增脩御河西堤

高三尺并計度西堤開置斗門決北京恩冀滄州永靜  
軍積水入御河枯源明年秋黃河漲入御河行流浸大  
名府館陶縣敗廬舍復用夫七千役二十萬餘工脩西  
堤三月始畢漲水復壞之

政和五年閏正月詔於恩州北增脩御河東堤為治水  
隄防令京西路差借來年分溝河夫千人赴役於是都  
水使者孟揆移撥十八埽官兵分地步脩築又取棗強  
上埽水口以下舊堤所管榆柳為樁木

元世祖至元七年役夫一千疏浚武清縣御河八十日  
竣工

九年七月衛輝河決委都水監馬良弼與本路官同詣  
相視差水夫併力脩完之

二十六年以壽張尹韓仲暉言遣尚書張孔孫李處巽  
董夫起於須城安山之西南開河引汶水達舟於臨清  
之御河其長二百五十餘里中建牖三十一度高低分  
遠近以節蓄洩凡六閱月竣工役工二百五十一萬七

百四十八賜名會通河

二十七年遣漕副馬之貞率放罷輸運站戶三千脩濬會通河道易牒以石是後歲委都水監官一員佩分監印率令史等往職巡視督工至泰定二年竣工

大德五年詔脩灤河東西二隄用工三十一萬

延祐元年以大船入會通河有礙餘船不得往來乃於金溝沽頭兩閘中置二隘閘臨清置一隘閘各濶一丈止許一百五十料船得入其後民乃造長船八九十尺

甚至百尺皆五六百料比至閘內不能回轉又阻餘船  
又於隘閘下約八十步河北立二石中間相離五六十  
尺如舟至量長如式方許入閘

順帝至正六年河決九年脫脫為丞相薦都漕運使賈  
魯於帝用其策十一年四月命魯為總治河防使是月  
二十二日鳩工七月疏鑿成八月決水故河九月舟楫  
通行十一月畢工

詳見歐陽玄記

國朝洪武元年河決曹州雙河口流入魚臺命大將軍

徐達開塌場口入於泗

二十四年河決原武縣黑陽山由舊曹縣鄆城兩河口漫過安山而會通河淤乃自濟寧以北陸運至德州入河

永樂九年命工部尚書宋禮都督周長等發山東濟兗青東四府丁夫十五萬登萊二府願赴工之人一萬五千濬元會通河又用汶上縣老人白英計於東平州東六十里戴村舊汶河口築壩導汶水西南流由黑馬溝



至汶上縣鵝河口入漕

正統十三年河決滎陽自開封城北經曹濮北衝張秋潰沙灣東隄以達於海命工部右侍郎王永和治之至十四年五月罷役

景泰三年以沙灣決口久不塞運道膠淺遣工部尚書兼大理卿石璞治之五月隄成六月大雨河復決十二月遣工部侍郎趙滎治之復遣都御史王文祭告大河之神

四年二月築沙灣決口功成五月復大決北馬頭河岸四十餘丈運道絕復遣石璞往十月命都御史徐有貞治之始塞乃於開封金龍口筭尾廂開渠三十里引黃河水東北入漕河以濟運

成化間開濟寧西河自耐牢坡至塌場口長九十里汶水入焉改耐牢坡閘名永通

弘治二年河徙汴城溢流自金龍口黃陵岡東經曹濮衝張秋運河命刑部尚書白昂治之役夫三十五萬遂

塞金龍口於滎澤開渠導河由陳潁至壽州達於淮又築渠堰於徐兗瀛滄之間以殺河勢

五年河復決金龍口由黃陵岡北趨張秋絕運河而東掠汶入海命工部侍郎陳政治之未幾政卒六年二月以浙江布政劉大夏為右副都御史往治決河又命太監李興平江伯陳銳佐之役丁夫十二萬乃先䟽祥符滎澤上流東入於淮又䟽賈魯舊河四十餘里出之徐州支流既分水勢漸殺乃築張秋決口又於黃陵岡之

東西築長堤各三百餘里金龍口之東西築長堤各二百餘里於是黃河東流經歸德徐州達於淮而張秋之決遂塞八年二月河功成賜鎮名曰安平大夏等陞賞有差

十四年二月以通政韓鼎言築安平鎮顯惠廟地基并瀕河堤岸

嘉靖三十一年大水衛河決工部員外郎周思兼督衆築塞之

四十四年七月河決曹縣自棠林集以下分為二支其  
北一支遶豐縣華山出飛雲橋至湖陵城口漫入昭陽  
湖沽頭一帶運河湮塞命工部尚書朱衡治之先築馬  
家橋東隄五十餘里過河使出飛雲橋盡入於秦溝乃  
開新河自南陽至留城一百四十一里河患始息

命都御史王文治河勅

景泰三年

勅曰近聞南京地震江淮以北直至濟寧水漲淹沒禾  
稼遠近乏食或至流移及東昌府接連河南地方往因

黃河奔潰北流散漫衝決漕河隄岸阻滯官民運輸雖  
嘗遣人脩濬尚未有經久計此皆朕所晝夜在心不遑  
寢食者也朕以爾為憲臣之長素有幹濟之才特命往  
理其事凡所至處苟有可以安輯國家拯濟生民通順  
河道一切興利除害之事悉聽爾廣詢博訪便宜而行  
有應奏請及與山東河南巡撫方面府州縣及公差官  
員會同計議從長處置者並聽議行務在停當舉之有  
益行之無弊凡前數事為之果有成效爾即具奏還京

爾其欽承朕命毋怠毋忽

命戶部侍郎白昂治河

勅弘治二年

勅曰近聞河南黃河泛溢自金龍等口分為二股流經北直隸山東地方入於張秋運河所過閘座間有淹沒隄岸多被衝塌若不趁時預先整理明年夏秋大水必至潰決旁出有妨漕運所繫匪輕今以爾曾監督工程績效著聞特改前職馳驛會同山東河南北直隸巡撫都御史督同三處分巡分守并知府等官自上源決口

至於運河一帶經行地方逐一踏看明白從長計議脩築疏濬應改圖者從便改圖各照地方量起軍民人夫趁時興工務要隨在有益各為經久不可虛應故事仍須禁約所司毋得指此妄加科派騷擾地方凡用工軍夫皆須撫恤周備毋令下人逼迫剝害違者輕則量加懲治重則送各該問刑衙門問理爾為朝廷重臣受茲委託尤須晝夜用心躬親勤勞博采衆長相機行事務使軍民不擾工程易集斯為爾能事完之日爾即回京



仍將修過緣由并用過工料數目造冊奏繳以憑查考  
故勅

命工部侍郎陳政治河勅

弘治五年

勅曰朕聞黃河流經河南山東南北直隸平曠之地遷徙不常為患久矣近者頗甚蓋舊自開封東南入淮今故道淤淺漸徙而北與沁水合流勢益奔放河南蘭陽考城山東曹縣鄆城等處俱被淹沒勢逼張秋運道潦水一盛難保無虞廷臣屢請脩濬且言事連四省不相

統攝須得大臣總理庶克濟事今特命爾帶同本部員外郎陶嵩署員外郎事張謨前去會同各該巡撫巡按督同布按二司直隸府衛掌印并管河官自河南上流及山東直隸一帶直抵運河躬親踏勘計議何處應疏濬以殺其勢何處應脩築以防其決會計樁木等料若干着落各該軍衛有司措辦然後相度事勢緩急工程大小起倩附近民相兼在官人夫趁時用工務使民患消弭運道通行不可虛應故事然此係國家大計凡事

有相關及勅內該載不盡者聽爾計議停當便宜而行  
文武職官敢有怠慢誤事者輕則量情責罰重則文職  
五品以下徑自送問四品以上并方面軍職參奏爾受  
茲重託尤當晝夜籌畫勉圖成功仍撫恤下人使皆樂  
於趨事則工易完而人不怨斯無負委任其勉之故勅

命副都御史劉大夏治河勅

弘治六年

勅曰朕聞黃河自宋元以來與淮河合流由南清河口  
入海所經河南山東南北直隸之境遷徙不常屢為民

患近年汴城東南舊道淤淺河流北徙合於沁水勢益  
奔河南之蘭陽考城山東之曹縣鄆城等處俱被淹沒  
逼張秋有妨運道先命工部侍郎陳政會同各該巡撫  
巡按等官設法脩理今幾半年未及即工而政物故有  
司以聞朕念古人治河只是除民之害今日治河乃是  
恐妨運道致誤國計其所關係蓋非細故且聞陳政所  
行多有非宜故詔有司會舉僉以爾大夏名聞故特陞  
爾為都察院右副都御史往理其事爾至彼先須案查

陳政所行事務酌量其當否當者緒續之否者改正之  
會同各該巡撫巡按都布按三司及南北直隸府州掌  
印官並管河官自河南上流及山東兩直隸河患所在  
之處逐一躬親踏勘從長計議何處應疏濬以殺其勢  
何處應脩築以防其決及會計椿木等料有無而設法  
分派軍民夫役多寡趁時起集必須相度地勢詢訪人  
言務在萬全毋貽後患然事有緩急而施行之際必以  
當急為先今已春暮運船將至勅爾即移文總督漕運

巡河管河等官約會自濟寧循會通河一帶至於臨清  
相視見今河水漫散其於運河有無妨礙今年船往來  
有無阻滯多方設法必使糧運通行不至過期以失歲  
額糧運既通方可溯流尋源按視地勢商度用工以施  
疏塞之方以為經久之計必須役不再興河流循軌國  
計不虧斯爾之能此係國家大事凡勅內該載不盡事  
理爾有所見或人言可采聽爾便宜而行一應文武職  
官敢有怠慢誤事者輕則量情責罰重則文職五品以

下徑自送問刑衙門問理四品以上並方面軍職參奏  
爾受朝廷重託尤當晝夜籌畫勉圖成功不許苟且廢  
率勞民力於無用糜財用於不貲以致生他變仍須撫  
恤下人使皆樂於趨事則功易完而人不怨斯無負於  
委任其勉之慎之故勅

命平江伯陳銳等同劉大夏治河敕

弘治七年

勅曰朕惟天下之水黃河為大國家之計漕運為重即  
今河決張秋有妨運道先命都御史劉大夏往治之未

見成功茲特命爾等前去總督脩理爾等至彼會同大  
夏相與講究次第施行仍會各該巡撫巡按并管河官  
自河南上流及山東直隸河患所經之處逐一躬親踏  
勘從長計議何處應疏導以殺其勢何處應補脩以防  
其決何處應築塞以制其橫潰何處應浚深以收其汎  
濫或多為之委使水力分散以瀉其大勢或疏塞並舉  
使挽河入淮以復其故道雖然事有緩急而施行之際  
必以當急為先今河既中決運渠乾淺京儲不繼事莫



急焉爾等必須多方設法使糧運通行不致過期以虧  
歲額斯爾之能然此乃國家大事或勅內該載不盡事  
理爾等有所見聞聽爾便宜而行其一應合用竹木麻  
鐵等料應役軍民夫匠人力如原先科派起集不敷方  
許量添不可輕信人言過為科差恒念此時瀕河軍民  
方困饑疫不幸值此大役甚不聊生萬一功不成物為  
徒費或生他變悔之何及各該司府州縣等衙門委任  
集辦并借用順帶夫料等項不許推調稽違誤事有應

奏聞者奏來處置其見用官屬沛不勝任者不必改委所委文武職官敢有誤事作弊者輕則聽爾量情責罰重則文職五品以下拿送問刑衙門問理四品以上并方面軍職參奏究治爾等受茲重任必思廉以律已勤以建功廣詢博訪事不必專於一己深謀遠慮計必出於萬全仍禁戢下人使不敢怙勢作威以凌人招賂受惜物用使不至假公營私以浪費冒支所用軍夫尤宜用心撫卹必使勞逸均平不至失所如此則役不徒興

而大功可成矣不然則勞民力於無用之地棄民財於不測之淵咎將誰歸爾等其欽承朕命毋怠毋忽

滄州導水記略

元王大本

黃河既南徙九河故道遂以湮沒漳瀆不與同歸獨行二千里會于今北海之涯其流滔滔汨汨視黃河伯仲間耳垠岸高於平地亦猶黃河之水下成羣虎牢而東也皇元定都于燕漳河為運漕之渠控引東南居貨千櫓萬艘上供軍國經用巨商富賈懋遷有無胥此焉出

至元五年秋八月大雨河決八里塘之灣為口者三湍  
流滾激如萬馬奔突長驅而前南皮清池之境東西二  
百餘里南北三十餘里潞而澤滙而淵竈陞而蝸產焉  
塲圃而魚生焉蕩析離居之民相與言曰滄州古雄藩  
其濠深廣又距海孔邇水行故地第有屯府小左衛曲  
防之阻無由徑達秦定間鄉民呂叔範抗疏陳情奉旨  
開掘以便民又為大渠以洩水莫不舉手加額以承無  
疆之休繼有方命圯族實繁有徒乘時射利遂以復塞

今則牢不可破矣脫因不花者以國學上舍生聞其言  
慨然以為己任而不辭聞者壯其謀從之如雲各執其  
物立于兩垸破其築若摧枯拉朽去其壅如決癰潰疣  
義民所趨水亦隨赴始屯軍先率其徒數百人盛氣以  
待我衆直而壯彼自度非敵逡巡而去事可以稽舊典  
而義可以激流俗也因刻石以遺後來

開會通河功成之碑

楊文郁

聖神文武大光孝皇帝在位之十七年江南平薄海內

外罔不拱北臣順奔走率職汶合泗分流以達東阿乃  
置汶泗都漕運使司控引江淮嶺海以供億京師自東  
阿至臨清二百里舍舟而陸車輸至御河徒民一萬三  
千二百七十六戶除租庸調奈道經荏平其間地勢卑  
下遇夏秋霖潦牛僨輓脫艱阻萬狀或使驛旁牛貢獻  
相望負戴底滯晦暝呼警行居騷然公私以為病久矣  
壽張縣尹韓仲暉前太史邊源相繼建言汶水屬之御  
河比陸運利相十百時詔廷臣求其策未得要便以仲

暉源言為然遂以都漕運使馬之貞同源按視之貞等至則循行地形商度功用參之衆議圖上曲折備言可開之狀政府信其可成於是丞相相哥合同僚數奏且以圖進上俞允賜中統楮幣一百五十萬緡米四萬石鹽五萬斤以給傭直備器用徵傍近郡丁夫三萬驛遣斡事官忙達兒禮部尚書張禮孫兵部郎中李處巽洎之貞源同主其役二十六年正月己亥首事起須城安山之西南壽張西北行過東昌又西北至臨清達御河

其長二百五十餘里吏謹督程人悉致力渠尋畢功益  
加濬治以六月辛亥決汶流以趣之滔滔汨汨傾注順  
適如追大勢如復故道舟楫連檣而下仍起堰閘以節  
蓄洩完隄防以備盪激凡用工二百五十一萬七百四  
十有八濬渠之民老幼攜扶縱觀徊翔不違按堵之安  
喜見泛舟之役于時大駕臨幸上都驛置以聞上詔翰  
林院其為運河命名且文其碑臣等乞賜名會通百拜  
稽首而屬辭曰謹按書以食貨為八政之首易稱舟楫



有濟川之利故大舜命禹既平水土定九州之貢賦皆  
浮舟達河以入冀都自茲以降漢用鄭當時之言引渭  
至河以利西都唐用劉晏之策由汴入河以濟關輔蓋  
京師者四方輻輳兆姓雲集六師所依以疆百司所資  
以辦不豐儲積政將奚先我國家新天邑于析木之津  
建萬億年無疆之業規模宏遠治具周密若夫漕運流  
通國之大計舟車致遠功利懸絕所宜講而行之雖費  
而不可省勞而不可已者今則費取於官利及於民役

不逾時功垂後世加以隨時豐歉權事重輕以深致曲  
成萬物之意致國殷富由此途出臣因竊迹興地圖若  
近代遼氏金源氏皆嘗立國當時經度曾不是思豈不  
以興王之功非僻陋者所能與而前弗逮乃所以啟肇  
建也歟先儒有言聖人在上則興利除害易成而難廢  
欽惟皇上開物成務邁舜禹而軼漢唐區區近代之君  
固無以議為也臣備屬北門職在紀事之成不敢以固  
陋辭仰奉明詔以識歲月且推衍興誦昧冒論著至若

神功聖德之盛沛惠澤以浸八荒資始資生上下與天地同流蓋非纂河渠溝洫者所能髣髴也九月日臣文郁謹記

濬洸河記

李惟明

洸河關祀久漸堙乎汶沙底平相較反崇汶三尺許山水漲後其流涓涓幾不接會道汶歲築沙堰竭水如洸堰尋決而洸自若所在淺澁漕事不遑至元四年戊寅秋七月漲潰東閘閘司併上之分監遣壕寨李讓相度

截斗際雪山麓石刺餘十有八里堙淤為尤揆日較工  
知監力濬不易因言分監倩有司贊翼功庶可就監丞  
馬元承德為覆實備關內監稟中書允發秦安之奉符  
東平之汶上一縣夫六十餘期濬五年春初閭未遑冬  
監丞宋公伯顏不花文林分治會通役先上源迺掄豪  
寨官岳聚統監夫千合二縣權興於六年仲春望日底  
濶五步上倍之深五尺濬如式公以令史周守信奏差  
不花驛來任之而聚也勤敏厥職監守者不迫趨事者

不緩居者不擾役者不勞未閱月工畢而深固堅完水  
濟會通漕運無虞汶上尹王侯居敬輩狀其實徵文以  
記余忝部民義弗獲辭余聞論者謂堰壅沙以致堙洸  
河是得其一未知其二也近年泰山徂徠等處故所謂  
山坡雜木怪草盤根之固土者今皆墾為熟地由霖雨  
時降山水漲逸衝突沙土萃貫汶河年復若是以致汶  
沙其浩浩若彼而洸因以淤澱也設無堽城堰洸自爾  
奚獨尤彼也聞司不知虞此直以水之盈縮民之利害

為節而開閉之非知所先務矣要之洗河既濬宜令閘  
司嚴節閘板謹杜閘口絕塞沙源勿令流沙上漫入洗  
後撤堰石底流又閘口漲落扒去淤沙不使少停閘水  
益深俾洗常受清水以輸注南北役閘似繁濬洗實簡  
此源潔流清而永益也不然以歲益無窮之汶沙注新  
濬有限之洗河數年之中余恐淤澱有甚於今日矣梗  
漕勸民後將有不勝其淘濬之患謹記

重修洗河記

洸河乃今汶水支流也名不載於傳記或因舊而加以  
新名尤不可知其源則出於泰山郡萊蕪縣原山之陽  
折而之南達於會通漕運南北其利無窮會通之源洸  
也洸之源汶也時霖雨作泰岱萬壑溝瀆之間合注而  
之汶洪濤洶涌泥沙溷奔徑入于洸此洸所以淤填也  
至元六年監丞宋公濬自腴口至石剌事鑄于珉然洸  
之源雖通而其流猶梗公謂不䟽其流源將安之又恐  
前功徒費後患復萌使會通之津從而涸也詢及其佐

得壕寨岳聚所度自石刺至高吳橋南王家道口淺澁者延袤五十六里百八十步呈準中書符下東平濟寧兼贊厥役本監及二路夫以口計者萬有二千濬自至正二年二月十八日落成於三月十四日以舉武計者二萬三百四十有奇以尺為工計者四十萬七百數同知東平路事伯顏察兒僉議少監公之功宜勒石以昭悠久迺請文於予義弗獲辭遂援筆而紀其歲月

重濬會通河記

趙元進



前至元二十六年開挑會通河道南自乎徐中由於濟  
北抵臨清遠及千里各處脩築閘壩積水行舟漕運諸  
貨官站民船偕得通濟北河殊無上源必須䟽淪汶水  
來注于洸決引泗源西逾于兗南入于濟達于任城合  
新河而流適者山水泛漲上自堽城閘口下至石刺之  
磧蔓延一十八里淤填河身反高於汶是以水淺幾不  
能接漕運今至元五年冬十月都水監丞宋公韓伯顏  
不花擢陞斯職遂差壕寨梁仲祥詣彼度其里步計其

人工時方水汭地凍難便為力越明年春二月選差壕寨岳聚監董本監并汶上奉符等縣人夫七千餘名備糗糧具畚鍤挑洗各處河身之淺公乃親督其役朝夕無怠五旬而工畢汶泗洸濟之水源源而來湊乎會通舟無淺澁之患公又見濟州會源石閘二座中央天井廣袤里餘停泊舟航相次上下內常儲水滿溢方許放牐近年漸以淤澱澮水甚少今復洶濟已深水常激灑以寬櫓艤夏四月公又率領令吏奏差巡視源閘北元

有濟河舊跡河身填平水已絕流再委壕寨岳聚領夫  
千名挑去泥沙衍三百餘步廣二丈五尺東連米市西  
接草橋水勢分流舟航往來無礙百姓大悅持狀請予  
為記予乃採摭其實而書之用規于後

### 河防記

歐陽玄

翰林學士承旨

至正四年夏五月大雨二十餘日黃河暴溢水平地深  
二丈許北決白茅堤六月又北決金堤竝河郡邑濟寧  
單州虞城碭山金鄉魚臺豐沛定陶楚邱武城以至曹

州東明鉅野鄆城嘉祥汶上任城等處皆罹水患民老  
弱昏墊壯者流離四方水勢北浸安山沿入會通運河  
延袤濟南河間省臣以聞朝廷患之遣使體量仍督大  
臣訪求治河方略九年冬脫脫既復為丞相慨然請任  
其事帝嘉納之乃命集羣臣議廷中言人人殊唯都漕  
運使賈魯昌言必當治先是魯嘗為山東道奉使宣撫  
首領官循行被水郡邑具得脩捍成策後又為都水使  
者奉旨詣河上相視驗狀為圖以二策進獻一議脩築

北隄以制橫潰其用功省一議踈塞竝舉挽河使東行  
以復故道其功費甚大至是復以二策對脫脫雖其後  
策議定乃薦魯于帝大稱旨十一年四月命魯以工部  
尚書為總治河防使進秩二品授以銀印發汴梁大名  
十有三路民十五萬人廬州等戍十有八翼軍二萬人  
供役一切從事大小軍民咸稟節度便宜興繕是月二  
十二日鳩工七月䟽鑿成八月決水故河九月舟楫通  
行十一月水土工畢諸埽諸堤成河乃復故道東匯于

淮又東入于海帝遣貴臣報祭河伯召魯還京師論功  
超拜榮祿大夫集賢大學士其宣力諸臣遷賞有差賜  
丞相脫脫世襲答剌罕之號特命翰林學士承旨歐陽  
玄製河平碑文以旌勞績玄既為河平之碑又自以為  
司馬遷班固記河渠溝洫僅載治水之道不言其方便  
後世任斯事者無所考則乃從魯訪問方略及詢過客  
質吏牘作至正河防記欲使來世罹河患者按而求之  
其言曰治河一也有疏有濬有塞三者異焉釃河之流

因而導之謂之䟽去河之淤因而深之謂之濬抑河之  
暴因而扼之謂之塞䟽濬之別有四曰生地曰故道曰  
河身曰減水河生地有直有紆因直而鑿之可就故道  
故道有高有卑高者平之以趨卑高卑相就則高不壅  
卑不滯慮夫壅生潰滯生堙也河身者水雖通行自有  
廣狹狹雖受水水溢悍故狹者以計闊之廣雖為岸岸  
善崩故廣者以計禦之減水河者水放曠則以制其狂  
水隳突則以殺其怒治隄一也有剏築脩築補築之名

有刺水隄有截河隄有護岸隄有縷水隄有石船隄治  
埽一也有岸埽水埽有龍尾欄頭馬頭等埽其為埽臺  
及推卷牽制蘊掛之法有用土用石用鐵用草木用棧  
用絙之方塞河一也有缺口有豁口有龍口缺口者已  
成川豁口者舊常為水所豁水退則口下於隄水漲則  
溢出於口龍口者水之所會自新河入故道之深也此  
外不能悉書因其用功之次序而就述於其下焉其濬  
故道深廣不等通長二百八十里百五十四步而強功



始自白茅長百八十二里繼自黃陵岡至南白茅關生  
生地十里口初受廣百八十步深二丈有二尺已下停  
廣百步高下不等相折深二丈及泉曰停曰折者用古  
算法因此推彼知其勢之低昂相準而取勻停也南白  
茅至劉莊村接入故道十里通折壑廣八十步深九尺  
劉莊至專固至黃固壑生地八里面廣百步底廣九十  
步高下相折深丈有五尺黃固至哈只口長五十一里  
八十步相折停廣壑六十步深五尺乃濬四里減水河

通長九十八里百五十四步四里村缺河口生地長三里四十步面廣六十步底廣四十步深一丈四尺自四里生地以下舊河身至張贊店長八十二里五十四步上三十六里墾廣二十步深五尺中三十五里墾廣二十八步深五尺下十里二百四十步墾廣二十六步深五尺張贊店至楊青村接入故道墾生地十有三里六十步面廣十六步底廣四十步深一丈四尺其塞專固缺口脩隄三重并補築四里減水河南岸豁口通長二

十里三百十有七步其初築河口前第一重西隄南北  
長三百三十步面廣二十五步底廣三十三步樹置椿  
橛實以土牛草葦雜稍相兼高丈有三尺隄前置龍尾  
大埽龍尾者伐大樹連梢繫之隄旁隨水上下以破嚙  
岸浪者也築第二重正隄并補兩端舊隄長十有一里  
三百步缺口正隄長四里兩隄相接舊隄置椿堵閉河  
身長百四十五步用土牛草葦稍土相兼脩築底廣三  
十步脩高一丈其岸上土工脩築者長三里二百十有

五步有奇高廣不等通高一丈五尺補築舊隄者長七里三百步表裏傍薄七步增卑六尺計高一丈築第三重東後隄并接脩舊隄高廣不等通長八里補築四里減水河南岸豁口四處置椿木草土相兼長四十七步於是塞黃陵全河水中及岸上脩隄長三十六里百三十六步其脩大隄刺水者二長十有四里七十步其西復作大隄刺水者一長十有二里百三十步內勦築岸上土隄西北起李八宅西隄東南至舊河岸長十里百

五十步顛廣四步趾廣三之高丈有五尺仍築舊河岸  
至入水隄長四百三十步趾廣三十步顛殺其六之一  
接脩入水兩岸埽隄竝行作西埽者夏入水工徵自靈  
武作東埽者漢人水工徵自近畿其法以竹絡實以小  
石每埽不等以蒲葦綿腰索徑寸許者從鋪廣可一二  
十步長可二三十步又以曳埽索綯徑三寸或四寸長  
二百餘尺者衡鋪之相間復以竹葦麻棘大緯長三百  
尺者為管心索就繫綿腰索之端於其上以草數千束

多至萬餘勻布厚鋪於綿腰索之上囊而納之丁夫數千以足踏實推卷稍高即以水工二人立其上而號於衆衆聲力舉用大小推梯推卷成埽高下長短不等大者高二丈小者不下丈餘又用大索或五為腰索轉致河濱選健丁操管心索順埽臺立踏或掛之臺中鐵猫大槩之上以漸絕之下水埽後掘地為渠陷管心索渠中以散草厚覆築之以土其上復以土牛雜草小埽稍土多寡厚薄先後隨宜脩疊為埽臺務使牽制上下鎮

密堅壯互為犄角埽不動搖日力不足火以繼之積累  
既畢復施前法卷埽以厭先下之埽量水淺深制埽厚  
薄疊之多至四埽而止兩埽之間置竹絡高二丈或三  
丈圍四丈五尺實以小石土牛既滿繫以竹纜其兩旁  
竝埽密下大椿就以竹絡上大竹腰索繫於椿上東西  
兩埽及其中竹絡之上以草土等物為埽臺約長五十  
步或百步再下埽即以竹索或麻索長八百尺或五百  
尺者一二雜廁其餘管心索之間候埽入水之後其餘

管心索如前墮掛隨以管心長索遠置五七十步之外或鐵猶或大椿曳而繫之通管束累日所下之埽再以草土等物通脩成隄又以龍尾大埽密掛於護隄大椿分析水勢其隄長二百七十步北廣四十二步中廣五十五步南廣四十二步自顛至趾通高三丈八尺其截河大隄高廣不等長十有九里百七十七步其在黃陵北岸者長十里四十一步築岸上土隄西北起東西故隄東南至河口長七里九十七步顛廣六步趾倍之而



強二步高丈有五尺接脩入水施土牛小埽稍草雜土  
多寡厚薄隨宜脩疊及下竹絡安大椿繫龍尾埽如前  
兩隄法唯脩疊埽臺增用白闌小石并埽上及前游脩  
埽隄一長百餘步直抵龍口稍北欄頭三埽並行埽大  
隄廣與刺水二隄不同通前列四埽間以竹絡成一大  
隄長二百八十步北廣百一十步其顛至水面高丈有  
五尺水面至澤腹高二丈五尺通高三丈五尺中流廣  
八十步其顛至水面高丈有五尺水面至澤腹高五丈

五尺通高七丈竝牂築縷水橫隄一東起北截河大隄  
西抵西刺水大隄又一隄東起中刺水大隄西抵西刺  
水大隄通長二里四十步亦顛廣四步趾三之高丈有  
五尺脩黃陵南岸長九里百六十步內牂岸土隄東北  
起新補白茅故隄西南至舊河口高廣不等長八里二  
百五十步乃入水作石船大隄蓋由是秋八月二十九  
日乙巳道故河流先所脩北岸西由刺水及截河三隄  
猶短約水尚少力未足恃決河勢大南北廣四百餘步

中流深三丈餘蓋以秋漲水多故河十之八兩河爭流  
近故河口水刷岸北行洄漩湍激難以下埽且埽行或  
遲恐水盡涌入決河因淤故河前功遂隳魯乃精思障  
水入故河之方以九月七日癸丑逆流排大船二十七  
艘前後連以大桅或長樁用大麻索竹絙絞縛綴為方  
舟又用大麻索竹絙用船身綴繞上下全牢不可破乃  
以鐵锚於二流碶之水中又以竹絙絕長七八百尺者  
繫兩岸大樑上每絙或碶二舟或三舟使不得下船腹

略鋪散草滿貯小石以合子板釘合之復以埽密布合子板上或二重或三重以大麻索縛之急復縛橫木三道於頭桅皆以索繼之用竹編笆夾以草石立之桅前約長丈餘名曰水簾桅復以木樁柱使簾不偃仆然後選水工便捷者每船各二人執斧鑿立船首尾岸上槌鼓為號鼓鳴一時齊鑿須臾舟穴水入舟沉遏決河水怒溢故河水暴增即重樹水簾令後復布小埽土牛白間長稍雜以草土等物隨宜填塽以繼之石船下詣實

地出水基跼漸高復卷大埽以厭之前船勢略定尋用  
前法沉餘船以竟後功昏曉百刻役夫分番其勞無少  
間斷船隄之後草埽三道竝舉中置竹絡盛石竝埽置  
椿用纜四埽及絡一如脩北截水隄之法第以中流水  
深數丈用物之多施工之大數倍他隄船隄距北岸纔  
四五十步勢迫東河流峻若自天降深淺叵測於是先  
卷下大埽約高二丈者或四或五始出水面脩至河口  
一二十步用功尤艱薄龍口喧飀猛疾勢撼埽基陷裂

欽傾俄遠故所觀者股弁衆議騰沸以為難合然勢不容已魯神色不動機解捷出進官吏工徒十餘萬人日加獎諭辭旨懇至衆皆感激赴工十一月十一日丁巳龍口遂合決河絕流故道復通又於岸前通港欄頭埽各一道多者或三或四前埽出水管心大索繫前埽碇後欄頭埽之後復埽管心大索亦繫小埽碇前欄頭埽之前後先羈縻以銅其勢又於所交索上及兩埽之間壓於小石白闌土牛相伴厚薄多寡相勢措置埽隄

之後自南岸復脩一隄抵已閉之龍口長二百七十步  
船隄四道成隄用農家場圃之具曰轆軸者穴石立木  
如比櫛雍前埽之旁每一步置一轆軸以橫木貫其後  
又穴石以徑二寸餘麻索貫之繫橫木上密掛龍尾大  
埽使夏秋潦水冬春凌薄不得肆力於岸此隄接北岸  
截河大隄長二百七十步南廣百二十步顛至水面高  
丈有七尺水面至澤腹高四丈二尺中流廣八十步顛  
至水面高丈有五尺水面至澤腹高五丈五尺通高七

丈仍治南岸護隄埽一道通長百三十步南岸護岸馬  
頭埽三道通長九十五步脩築北岸隄防高廣不等通  
長二百五十四里七十一歩白茅河口至板城補築舊  
隄長二十五里二百八十五歩曹州板城至英賢村等  
處高廣不等長一百三十三里二百歩稍岡至碭山縣  
增倍舊隄長八十五里二十歩歸德府哈只口合至徐  
州路三百餘里脩築缺口一百七處高廣不等積脩計  
三里二百五十六歩亦思剌店縷水月隄高廣不等長



六里三十步其用物之凡椿木大者二萬七千榆柳雜  
稍六十六萬六千帶稍連根株者三千六百藁秸蒲葦  
雜草以束計者七百三十三萬五千有奇竹竿六十二  
萬五千葦席十有七萬二千小石二千艘繩索大小不  
等五萬七千所沉大船百有二十鐵纜三十有二鐵猫  
三百三十有四竹筏以斤計者十有五萬礮石三千塊  
鐵鑽萬四千二百有奇大釘三萬三千二百三十有二  
其餘若木龍鬚椽木麥楷扶椿鐵叉鐵吊枝麻搭火鈎

汲水貯水等具皆有成數官吏俸給軍民衣糧工錢醫藥祭祀賑恤驛置馬乘及運竹木沉船渡船下椿等工鐵石竹木繩索等匠傭貲兼以和買民地為河井應用雜物等價通計中統鈔百八十四萬五千六百三十六錠有奇魯嘗有言水工之功視土工之功為難中流之功視河濱之功為難決河口視中流又難北岸之功視南岸為難用物之效草雖至柔能狎水水潰之生泥泥與草併力重如碇然維持夾輔纜索之功實多蓋由

魯習知河事故其功之所就如此玄之言曰是役也朝廷不惜重費不吝高爵為民辟害脫脫能體上意不憚焦勞不恤浮議為國極民魯能竭其心惠智計之巧乘其精神膽氣之壯不惜劬瘁不畏譏評以報君相知人之明宜悉書之使職史氏者有所考證也

勅脩河道功完之碑

明徐有貞

長洲人  
武功伯

惟景泰紀元之四年冬十月十有一日天子以河決沙灣久弗克治集左右丞弼暨百執事之臣於文淵閣議

舉可以治水者僉以臣有貞應詔乃錫璽書命之行天子若曰咨爾有貞惟河決於今七年東方之民厄於昏墊勞於堙築靡有寧居既屢遣治而弗即功轉漕道阻國計是虞朕甚憂之茲以命爾爾其往治欽哉臣有貞祇承惟謹既至乃奉揚明命戒吏飭工撫用士衆咨詢羣策率興厥事已乃周爰巡行自東北徂南西踰濟汶沿衛及沁循大河道濮范以還既究厥源流因度地行水乃上陳于天子曰臣聞凡平水土其要在乎天時地

利人事而已天時既經地利既緯而人事於是乎盡且夫水之為性可順焉以導不可逆焉以堙禹之行水行所無事用此道也今勢反是治所以難蓋河自雍而豫出險固而之夷斥其水之勢既肆又由豫而充土益疎水益肆而沙灣之東所謂大洪之口者適當其衝於是決焉而奪濟流入海之路以去諸水從之而洩隄以潰渠以淤澇則溢旱則涸此漕途所爲阻者與然欲驟而堙焉則不可故潰者益潰淤者益淤而莫捄也今欲捄

之請先䟽其水水勢平乃治其決決止乃濬其淤因為之方以時節宣俾無溢涸之患必如是而後有成制曰可臣有貞乃經營焉作制水之閘䟽水之渠渠起張秋金隄之首西南行九里而至濮陽之灤九里而至博陵之陂又六里而至壽張之沙河又八里而至東西影塘又十有五里而至白嶺之灣又三里而至李峯之涯由李峯而上又二十里而至竹口蓮花之池又三十里而至大瀦之潭乃踰范暨濮又上而西北數百里經瀆淵

以接河池之水過則害微則利故遏其過而導其微用  
平水勢既成名其渠曰廣濟閘曰通源渠有分合而閘  
有上下凡河流之旁出而不順者則堰之堰有九長袤  
皆至丈萬九堰既設其水遂不東衝沙灣乃更北出以  
濟漕渠之涸阿西郵東曹南鄆北之地出沮洳而資灌  
溉者為頃百數十萬行旅既便居民既安有貞知事可  
集乃參綜古法擇其善而為之加神用焉爰作大堰其  
上捷以水門其下繚以虹隄堰之崇三十有六尺其厚

什之長百之門之廣三十有六丈厚倍之隄之厚如門  
崇如堰而長倍之架濤截流欂櫨木絡竹實之石而鍵之  
鐵蓋合土木火金而一之用平水性既乃導汶泗之源  
而出諸川匯澶濮之流而納諸澤遂濬漕渠由沙灣而  
北至於臨清凡二百四十里南至於濟寧凡二百一十  
里復作放水之閘於東昌之龍灣魏灣凡八為水之度  
其盈過丈則放而洩之皆通古河以入於海上制其源  
下放其流既有所節且有所宣用平水道由是水害以



除水利以興初議者多難其事至欲棄渠弗治而由河  
沁及海以漕然卒不可行也時又有發京軍疏河之議  
有貢力奏蠲瀕河州縣之民馬牧庸役而專事河防以  
省軍費紓民力天子從之是役也凡用人工聚而間役  
者四萬五千有奇分而常役者萬三千有奇用木大小  
之材九萬六千有奇用竹以竿計倍木之數用鐵為斤  
十有二萬鍵三千緡百八釜一千八百有奇用麻百萬  
荆倍之藁稍又倍之而用石若土則不計其算然其用

糧於官以石計僅五萬而止焉蓋自始告祭興工至於  
工畢凡五百五十有五日於是治水官佐工部主事臣  
鉤參議山東布政使司事臣雲鵬僉山東按察司事臣  
蘭等咸以為惟水之治自古為難矧茲地當兩京之中  
天下之轉輸貢賦所由以達使終弗治其為患孰大焉  
夫白之渠以溉不以漕鄭之渠以漕不以貢而工皆累  
年費皆鉅億若漢武之瓠子不以溉不以漕又不以貢  
而役久弗成兵民俱敝至躬勞萬乘投璧馬籲神祇而

後已以彼視此孰輕孰重孰難孰易乃今役不再期費  
不重科以溉焉以漕焉以貢焉無弗便者是於軍國之  
計生民之資大矣厚矣其可以無紀述於來世臣有貞  
曰凡此成功實惟我聖天子之致所以俾臣之克效不  
奪淳議非天子之至明孰恃焉所以俾民之克寧不苦  
重役非天子之至仁孰賴焉有貞之於臣職其惟弗稱  
是懼矧敢貪天之功惟天子至明至仁之德不可以弗  
紀也臣有貞常備員翰林國史身親承之不可以嫌故

自輟乃拜手稽首而為之文曰皇奠九有歷年維久延天之祐既豫而豐有節以蒙見沫日中陽九百六數丁厥鞠龍蛇起陸水失其行河決東平漕渠以傾否泰相乘運維中興殷憂廼凝天子曰吁是任在予予可弗圖圖之孔亟歲行七易曾靡底績王會在茲國賦在茲民便在茲孰其幹濟其為予治去害而利惟汝有貞勉為朕行便宜是經臣拜受命朝嚴夕警將事惟敬載驅載馳載詢載謀載度以為乃分厥勢乃隄厥潰乃踈厥滯

分者既順隄者既定踈者既濬乃作水門鍵制其根河  
防永存有埽如龍有堰有虹護之重重水性斯從水利  
斯通水道斯同以漕以貢以莫不用邦計維重惟天子  
明浮議弗行功是用成惟天子仁加惠東民民是用寧臣  
拜稽首天子萬壽仁明是懋爰紀厥實勒茲貞石昭示  
無極

治水功成題名記

有貞之治水於山東而作沙灣等處之河防也承命於

景泰癸酉之冬經始於甲戌之春收功於乙亥之夏而告成於其秋上詔見奉天門嘉勞焉因命之居京管臺事丙子春有貞請勅載至乃擴前功益為大水之備時方膜乾衆莫喻其意頗以為過防及秋而大水洊至泗汶淇衛河沁一時俱溢環東兗之間若海之浸者三日逮冬始平運河南北餘千里故隄高岸之缺而不完者無慮百數十所而沙灣之正隄大堰獨歸然而存巍然而安其旁近城郭田疇皆恃焉而免墊役之患以水之

來有所扞而去有所洩也於是東充軍民耆老合辭以  
請今茲之水蓋洪武以來所未嘗有而大耋之人所未  
嘗見也非隄與堰為之保障非閘與渠為之排解吾田  
吾產其池潢矣吾耆吾倪其魚鼈矣彼四方之舟楫往  
來於斯者乃亦有曰昔也沙灣如地之獄今也沙灣如  
天之堂之語而況吾斯土之軍民乎哉而吾儕小人竊  
伏計焉惟水之變不測如今茲之溢以龍灣六閘洩之  
而猶未盡也以故感應祠之缺隄又煩公為之抃築焉

徵公在是其不又將延患累年乎願及今規畫而益為  
之防吾軍吾民幸甚有貞曰唯唯月中既築感應神之  
缺而作堰月之隄鼇甲之堰比沙灣水門大堰差小而  
埽法略等復行度東昌龍灣六閘之上官窰之口置閘  
一疏新渠而屬之篤馬東平戴廟之津置閘一疏古河  
而屬之大清并前六閘為八而皆注之海焉乃探禹遺  
之秘本星土經緯之理鑄玄金而作法象之器建之隄  
表大河感應二祠之中以為悠久之鎮蓋盡人事符天



造制物宜辟神姦其道竝行也既訖工有貞將歸奏於  
朝而從事諸賢亦合辭以請曰治水之功其既成矣經  
久之效其亦著矣惟古人作事而有成也必題其名願  
以碑之有貞乃言曰於乎是惟吾君之德與諸大夫士  
之力耳有貞其何敢當此且夫治水固聖人事也次則  
賢者能之如有貞又何足以與此雖然有貞聞之士以  
天下為心則天下事皆吾分內事也矧吾徒食君之祿  
受君之命而幹君之事哉臣幹君事視子幹父事而加

重吾徒而弗盡其心烏乎可大禹聖者也而於治水必  
胼手而胝足吾徒而弗盡其力烏乎可夫水之大而為  
中國患者莫如河自禹而下世之治者非一然可法者  
少而可戒者多也其不能成事者不必道就其成事者  
而論之如戰國之白圭漢之王延世王景元之賈魯是  
已圭之治河無所攷見然觀其以鄰國為壑則悖甚矣  
延世之治河無所節宣而徒亟塞其決雖以此取侯封  
而不足善也至如魯之治河見於歐陽玄之記者亦皆

塞之之具初無得乎行水之法矧當世季民窮之時而興十七萬衆之役又無撫安之策卒之為元召亂是又可以為戒者惟景之塢流分水頗得古法而孝明之治有惠於民故能保其成功而終漢世無河患方之於彼其特善乎有貞雖不敏也乃所願則上法大禹下取仲章而為之不敢不盡其心力洪惟聖明聽納臣言而大賚瀕河之民與之休息此吾與二三子之幸以有成功也是不可不知皆應曰然後題諸從事大夫士之名於

石而記之將俾後世之當治河之任者知所法戒云爾  
是行也前後歷三載焉凡作正隄一副隄二護隄四水  
門大堰一小堰一蓄水之堰三截水之堰九導水之渠  
二分水之渠二洩水之渠五制水之閘二放水之閘八  
若其備作功用次序本末之詳則具載前碑茲不重出

弘治庚戌治河記

王

僊

武進人吏部尚書

上即位改元弘治之明年己酉秋七月河決封邱泛金  
龍口溢開封諸郡邑蹙張秋淩會通河之長隄巡撫山

東都御史臣錢鉞以聞上命南京兵部左侍郎臣白昂  
為左侍郎授之璽書俾往治之時河自原武中年分流  
為三其大者切近汴隄之西北偶合沁河泛陽武封邱  
祥符陳留杞縣蘭陽儀封考城曹縣寧陵睢州歸德虞  
城永城夏邑碭山蕭縣而下徐淮其次者橫流於封邱  
之于家集決孫家口漫長垣曹濮鄆城陽穀壽張東昌  
至臨清下衛河延患於德州滄州興濟青縣靜海天津  
始入于海又其次者自中年南下尉氏雖稍成川而不

通舟楫若其故道自汴城西南杏花營入渦河者則淤  
澱矣上意以汴梁為宗室藩省所在漕河為京師饋餉  
所由而被災都郡為億兆生靈之所聚其繫尤重且急  
致廣聖慮省躬脩德圖惟治平乃命戶部搏邊庾之糧  
價計河南之儲積得白金一十七萬八千餘兩以備資  
費及諭臣昂以䟽濬脩築改圖之方尤惓惓以撫綏為  
要臣昂於是祇承德意敷宣於衆經畫考量僉謀克協  
時維寒沍預令有司集財用繕工具迨明年春乃大發

夫卒河南得五萬三千山東得一十一萬南北直隸共  
九萬有奇預戒所司役其富而舍其貧日食給以官廩  
故皆歡呼子來而鎮守巡按三司若御史臣杜忠臣陳  
寬臣張冕臣陳璧臣鄒魯臣馬良玉布政使臣王道臣  
吳珉臣徐恪按察使臣侯恂副使臣傅希說亦罔不同  
匡濟且選有司之良以分董其役既而河倏北徙去汴  
城者三十里金龍缺口日自淤塞然後人力可施而地  
理之宜不可以不審也於是奏舉欽天監漏刻博士臣

李源以相度之而以布政臣岫副使臣曉綜北隄之役  
自陽武封邱祥符蘭陽儀封凡五縣環而築之亘三百  
餘里高則因地之崇卑由七尺以及丈餘廣則視水之  
緩急自七丈而至十丈以防張秋之衝激以衛諸郡之  
泛溢若汴梁之舊隄歲漸卑薄乃以僉事臣俊都指揮  
臣劉勝董之增其高以尺計者自五而至七蓋其廣者  
皆五丈保障既固而向嘗為遷省之議者無事於行矣  
開封知府臣衛英同知臣劉恣經理之副使臣曉又



導南河自原武中牟下南頓至潁州由塗山達於鳳陽  
故道仍環繞於皇陵祖陵之前合淮以入海又奏舉南  
京兵部郎中臣婁性之睢河自歸德至宿州下睢寧出  
宿遷以入運河疏濬脩築綜理益密主事臣謝緝築塞  
蕭縣之徐渠等口皆所以殺黃沁二水侵汴徐之勢臣  
昂又以為東兗徐淮河間諸郡皆古九河所經之地其  
故跡已湮而陝西山西河南諸水皆源源而來以通諸  
海惟淮河直沽二道來者多而逝者少泛溢之患亦勢

所必至蓋亦經理其地南自徐州北至天津時有工部  
主事臣莫騄築隄濬河於濟寧之境添石壩於各閘之  
旁巡河御史臣孫衍郎中臣吳瑞開複河三十里於高  
郵湖隄之東畔以免風濤之險脩陳雷諸塘於揚州之  
域以興水利副使臣綱濬東平州戴家廟之裏河四十  
里參政臣純東昌知府臣趙琮鑿裏河十其一於東昌  
至博平者一百二十里一於張秋之北者二十里餘八  
各數里有奇俱下大清河以入于海副使臣仲宇於德

州之南四女樹鑿裏河二十五里至右黃河之九龍口  
及管河郎中臣吳珍河間知府臣謝文於滄州之境亦  
開土河共為十四每河口各建減水石牌以節運河水  
利盈則泄之于海而東竟德滄之水患以紓縮則蓄之  
於河而漕艘商舶之運行益利隨河脩隄二千餘里隨  
隄植柳百萬餘株又以管泉主事臣黃肅參政臣純濟  
萊蕪諸泉一百八十餘處以濟漕河大名知府臣李瓚  
亦築長隄以障沁衛漳河之暴水竝始事於仲春傷工

於首夏工傭稍食之資材水竹石草葦百物之費皆取  
官羨餘而不科於民總為穀粟二十五萬餘石白金二  
十萬餘兩其費出河南脩隄備者不及八千兩而猶存  
一十七萬餘兩為賑民之用若臨清會通河大閘歲又  
頽圯復偕都御史臣鉞議新之且遷置於衛河之濱去  
舊址百餘丈以衍其內足以容舟楫便漕運而以郎中  
臣珍主事臣陳玉副使臣仲宇程其工推官臣戴澄知  
州臣張增則集其事不三月而工亦完繕上聞是役既

成乃遣使齎香帛命臣昂代祀大河之神臣僕適以公  
事自南都入朝道經東昌知府臣琮述其顛末請為之  
記嘗試論之河自崑崙入中國沿洄數千里其奔放逸  
悍之勢蓋觸處皆然此有事四方者之所駭矚自瓠子  
之決金隄之潰以迄於天臺梁山之溢其激射浸淫之  
患亦無代無之此稽古者之所深慨自都水有監河渠  
有署自時厥後或遣使按行命官監治其施功當時數  
被後世者亦時復有焉此又志功業者之所艷慕如臣

昂固其人也矧又重聖明之簡注羣賢之協贊者哉是故宜其役不踰時績有成績以上紓當宁之憂下庇蒸人之生非偶然之故也是為記

安平鎮治水之碑

徐

溥

宜興人  
大學士

安平鎮舊名張秋實運河要地也景泰間黃河支流決鎮之沙灣壞運河朝廷命僉都御史徐有貞塞而隄之暨弘治六年復決於下流十里許汶水從之由東阿舊鹽河以入海厥後霖潦大溢廣至九十餘丈運河自東

而下率多淤涸舟楫不通今上以為憂既勅右副都御史臣劉大夏往治之又特勅內官監太監李興平江伯陳銳總督山東兵民夫役與之共事時夏且半漕舟已集一經決口挽力數倍稍失手輒覆溺不可掇僉謂宜急先務廼於西岸稍南鑿月河長三里許引舟由之次第皆濟歲運賴以不失及冬水落廼為塞決計規倣古法酌以時宜築東西二臺植木為表多施大索衆婦交下兩岸漸合中流用船雜寘土石鑿而沉之厭以巨埽

囊土以實其罅役夫番代閱三晝夜弗息而決始塞於外則斲石樹戕累築而固之又於其南為石壩以備宣節於上流為重隄以防奔潰至是運道復通而舊決皆為陸地矣初議以安平之上流為黃陵岡黃陵未塞則安平之功亦不易保故二役並興而湍勢悍激再塞再決羣喙洶洶莫知所定迄八年之二月皆以成告上累遣獎勞賜羊酒金幣諸物易鎮名曰安平又勅建神祠以祈冥佑名曰顯惠命有司春秋脩祀事是役也凡用



夫四萬餘薪芻以束計者八十四萬五千竹木以根計者三萬七千麻鐵以斤計者六十萬四千有奇而黃陵之役不與焉比復命於朝上若曰河決既塞越惟爾二三臣之勞爾興賜歲祿二十四石爾銳加太保兼太子太傅增歲祿二石石爾大夏陞左副都御史佐院事分董其役者山東左參政張縉擢通政司右通政仍治河防按察僉事廖中為副使暨文武官進秩加俸者百數十人各有差既又勅臣溥為文紀功績歲月以詔來世

臣故叙事紀日俾刻金石如宋靈平埽故事用復明命  
且儆于有職者系之以銘銘曰河出西域亘行域中土  
䟽水遷廣武之東虞周世邈漢患尤數歷宋至元治法  
益鑿我明北都會為漕渠再決張秋四紀之餘自西徂  
東赴海如注渠流中涸南北殊路帝命在廷惟內外臣  
來諮來營以極艱屯乃䟽其源乃塞其決羣工具興百  
慮或竭斷石於山伐木於林實土於囊載積載沉至再  
而三功乃克就故漕復通萬艦交輳奏章北上勞使南

行天子有命錫之嘉名坤靈效順河亦南徙水菑告平  
民乃寧止民贊且頌良臣之勲臣拜稽首天子聖神皇  
不自神予民父母匪天惠民孰我能佑隄石巖巖川流  
淙淙惟茲安平永鎮東邦

安平鎮治水功完碑

王

鏊

長洲人  
大學士

皇明建都燕薊歲漕東南以給都下會通河實國家氣  
脉而張秋又南北之咽喉景泰四年河決張秋武功伯  
徐有貞治之旋復故道弘治二年河勢北徙六年夏遂

決黃陵岡潰張秋隄奪汶水以入海張秋上下渺瀰際  
天東昌臨清河流幾絕前後遣官治之績用弗成上乃  
命右副都御史劉大夏往涖時訛言沸騰謂河不可治  
治之祇勞且費或謂河不必治宜復前元海運或謂陸  
輓雖勞無虞上復命太監李興平江伯陳銳同往涖之  
時夏且半漕集張秋帆檣鱗次財貨山委決口奔猛戒  
莫敢越或賈勇先發至則戰掉失度人船滅沒銳等聚  
謀始於上流開月河長可三里軼決口屬之河於是舳

艫相銜順流畢發懼喜載道事聞璽書獎勵乃始議築  
黃陵岡之決初大梁之北為沁河東南流入徐西為黃  
河東流入淮其後黃河忽溢入沁合流以北遂決黃陵  
岡以及張秋銳等議不治上流則決口不塞於是浚河  
及孫家渡七十餘里由陳潁以入淮又浚河自中牟扶  
溝陳潁二十餘里由宿遷以達于淮又浚賈魯舊河四  
十餘里由曹以入于徐於時向冬水且落迺於張秋兩  
岸東西築臺立表貫索網聯巨艦穴而窒之實以土牛

至決口去室沉艦壓以大埽合且復決隨決隨築吏戒  
丁勵畚鍤如雲連晝夜不息水乃自月河以北決既塞  
繚以石隄輔以棧柱又於上流作減水壩又濬南旺湖  
諸泉源又隄河三百餘里漕道復通役始於六年之夏  
其冬告成用軍民凡四萬餘人鐵為斤一萬九千有奇  
木三萬七千薪為束六十三萬芻二百二十萬次其役  
者通政使張縉山東按察副使廖中臣興臣銳臣大夏  
以其事聞上遣使慰勞令作廟鎮其上賜額曰顯惠神

祠鎮曰安平鎮命臣鑿紀其事臣拜手稽首而獻詩曰  
翼翼皇都殿此上游灌輸東南艤艫來浮黃河奔溢勢  
如萬馬逐嚙黃岡溢於鉅野帝咨於朝疇予治者咨汝  
大夏汝銳汝興協謀合力績乃用登三臣受命單車來  
屬迺相迺巡迺醜迺鑒既隄黃岡張秋乃築維天與時  
維人効力神謀鬼輸隋林蓄石昔事之始訖言震驚不  
震不奪由天子明維明天子維慎厥使殷其如山功成  
有偉塗人歌矣居人和矣舟之方之維其多矣帆帆安

平新命孔度四方攸同於萬斯年

黃陵岡河工完之碑

劉

健

大學士

弘治二年河徙汴城東北過沁水溢流為二一自祥符于家店經蘭陽歸德至徐邳入于淮一自荆隆口黃陵岡東經曹濮入張秋運河所至壞民田廬且損南北運河道天子憂之嘗命官往治時運道尚未損也六年夏大霖雨河流驟盛而荆隆口一支尤甚遂決張秋運河東岸併汶水奔注于海由是運道淤涸漕舟阻絕天子



益以為憂復命都察院右副都御史劉大夏治之既而慮其功不時上也又以總督之柄付之內官監太監臣李興平江伯臣陳銳俾銜命往三臣者乃同心協力以祇奉詔命遂自張秋決口視潰決之源以西至河南廣武山淤涸之跡以北至臨清衛河地形事宜既悉然以時當夏半水勢方盛又漕舟鱗壅口南因相與議曰治河之道通漕為急乃於決口兩岸鑿月河三里許屬之舊河以通漕舟漕舟既通又相與議黃陵岡在張秋之

上而荆隆等口又在黃陵岡潰決之源築塞固有緩急然治水之法不可不先殺其勢遂鑿滎澤孫家渡河道七十餘里濬祥符四府營淤河二十餘里以達淮疏賈魯舊河四十餘里由曹縣梁進口出徐州運河支流既分水勢漸殺于是乃議築塞諸口其自黃陵岡以上凡地屬河南者悉用河南兵民夫匠即以其方面統之按察副使臣張鼎都指揮僉事臣劉勝分統荆隆等口按察僉事臣李善都指揮僉事臣王杲分統黃陵岡而臣

興臣銳臣大夏往來總統之博采羣議晝夜計畫殆忘寢食故官屬夫匠等悉用命築臺捲埽齊心畢力遂獲成功焉初河南諸口之塞惟黃陵岡屢合而屢決為最難塞之後特築隄三重以護之其高各七丈厚半之又築長隄荆隆口之東西各二百餘里黃陵岡之東西各三百餘里直抵徐州俾河流恒南行故道而下流張秋可無潰決之患矣是役也用夫匠以名計五萬八千有奇柴草以束計一萬二千有奇竹木大小以根計一萬

二百有奇鐵生熟以斤計一萬九百有奇麻以斤計三十二萬有奇其興工以弘治甲寅十月而畢以次年二月會張秋以南至徐州工程俱畢臣興等遂具功完始末以聞天子嘉之特易張秋鎮名為安平賜臣興祿米歲二十四石加臣銳太保兼太子太傅祿米歲二百石進臣大夏左副都御史理院事及諸方面官屬進秩增俸有差乃從興等請於塞口各賜額立廟以祀水神安平鎮曰顯惠黃陵岡曰昭應已而又命翰林儒臣各以

工完之跡文之碑石昭示永久臣健以次撰黃陵岡臣  
惟前代於河之決而塞之者漢馮子宋澶濮曹濟之間  
皆積久而後成功或至臨塞躬勞萬乘今黃陵岡諸口  
潰決已歷數年且其勢洪濶奔放若不可為而築塞之  
功顧未盈二時此固諸臣協心夫匠用命之所致然非  
我聖天子至德格天水靈效職及宸斷之明委任之專  
豈能成功若是之速哉臣職在文字覩茲惠政誠不可  
以無紀述謹撫其事撰次如右且繫之以詩曰中州之

水河其最大龍門底柱猶未為害太行既北平壤是趨  
奔放潰決遂無寧區粵稽前代築脩屢起瓠子宣房實  
肇其始皇明啟運亦屢有聞安平黃岡奏決紛紜壞我  
民廬損我運道帝心憂之成功欲蚤乃命憲臣乃弘廟  
謨諄諄戒諭冀効勤劬功不時上復遣近侍繼以勲臣俾  
同往治三臣協力兼采羣謀晝夜焦勞罔或暫休既分  
別支以殺其勢遂遏洪流永堅其閉水由故道河患斯  
平運渠無損舟楫通行工畢來聞帝心嘉悅加祿與官

恩典昭晰惟茲大役不日告成感召之由天子聖明天  
子聖明化行德布匪直河水萬靈咸附殊方異域靡不  
來王以漕以貢億世無疆

夏鎮新河記

徐

階

華亭人  
大學士

先皇帝之四十四年秋七月河決而東注自華山出飛  
雲橋截沛以入昭陽湖于是沛之北水逆行歷湖陵孟  
陽至穀亭四十里其南溢于徐渺然成巨浸運道阻焉  
事聞詔吏部舉大臣之有才識者督河道都御史直隸

河南山東之撫臣洪閏之司屬暨諸藩臬有司治之得  
今萬安朱公衡爰自南京刑部尚書改工部尚書兼都  
察院右副都御史奉璽書總理其事公至駕輕舸凌風  
雨周視河流規復沛渠之舊而時瀦者為澤淤者為沮  
洳䟽與塞俱不得施公喟然嘆曰夫水之性下而茲地  
下甚不獨今不可治也即能治之他歲河水至且復淪  
沒若運事何召諸吏士及父老而問計或曰道南陽折  
而南東至於夏村又東南至於留城其地高河水不能



及昔中丞盛公應期嘗議鑿渠於此而不果就其迹尚  
存可續也公率僚屬視之果然馳疏以請先皇帝從之  
工既舉而民之規利與士大夫之泥於故常者爭以為  
復舊渠便先皇帝若曰茲國之大事謀之不可不審也  
勅工科右給事中何君起鳴勘議焉何君具言舊渠之  
難復者五急宜治新渠而增其所未備以濟漕運詔工  
部集廷臣議僉又以為然詔報可公乃廬於夏村晝夜  
督諸屬程役以工授匠以式測水之平鍤高而實下道

鮎魚諸泉薛沙諸河會其壩三河口以杜浮沙之壅隄  
馬家橋遏河之出飛雲者盡入於秦溝滌泥沙使不得  
積凡鑿新渠起南陽迄留城百四十一里有奇疏舊渠  
起留城迄境山五十三里建閘九減水閘十有六為月  
河於閘之旁者六為壩十有三石壩一隄於渠之兩涯  
以丈計者四萬一千六百有奇以里計者五十三為石  
隄三十里又疏支河九十六里一千六百餘丈脩其隄  
六千三百四十六丈而運道復通由徐達於濟舟行坦

然視舊加捷階惟國家建都燕薊百官六軍之食咸仰給於東南漕運者蓋國之大計也自海運罷而舟之轉漕獨茲一線之渠其通與塞又國之所謂大利大害也河勢悍而流濁塞之則復決濬之則輒淤事在往代及先朝者姑弗論即嘉靖間䟽築之役屢矣而卒未有數歲之寧則今徙渠而避焉誠計之所必由也然當議之初上也或以為方命或以為厲民譁之以衆口撓之以貴勢誣之以重謗脅之以危言于其時公之身且不能

自保況敢冀渠之成哉賴先皇帝明聖不怒不疑徐以公論付之諫臣擇兩端之中而因得夫久遠之策由是公始得竭智畢力以竟其初志而實其謀之非迂然則茲渠之成固公之功實先皇帝成之也昔禹受治水之命於堯盡舍其前人堙塞之圖而創為䟽導之說彼其驟聞焉者豈無或駭且謗乎惟堯信之深任之篤至八年而不二禹是以得建萬世永賴之績奉玄圭以告厥成則洪水底平雖謂堯之功可也而虞夏之史臣與後

世之文人學士咸知稱禹而莫知頌堯嗚呼此堯之德所以為無能名歟洪惟先皇帝力持國是以就茲渠功德之隆較之帝堯可謂協矣隋曩歲備員內閣嘗屢奉治河之諭邇者謝政南歸復得親至新渠觀其水土而考論其事之始末追感往昔不自知涕泗之交頤也遂因公請僭為之記且以告夫脩實錄者役始于四十四年十一月二十四日成於次年九月初九日用夫九萬一千有奇銀四十萬贊其議者河道都御史孫公慎潘

公季馴綜理於其間者工部郎中程道東游季勲沈子  
木朱應時涂淵主事陳楠李汶吳善言李承緒王宜唐  
鍊張純參政熊桴副使梁夢龍徐節胡湧張任陳奎李  
幼滋僉事董文家黎德克郭天祿劉贄並列名左方



北河紀卷三